

## **Brother Paul Zingtung Htoi Naw a Deacon Shatai Poi Galaw**

*29 June 2019, Myitkyina*

Kachyi Htu Jau ginwang, Layen Mare kaw na Brother Paul Zingtung Htoi Naw a Deacon shatai poi hpe lai wa sai June shata 29 ya, laban bat kru ya shani , Myitkyina San Columban Cathedral Nawku Jawng kaba hta galaw la lu sai rai nga ai.

Deacon shatai poi hta Myitkyina Sasana Sagurem wa Wa Saradaw Francis Daw Tang , Kachyi Htu Ginwang up Wajau John Nhpawt Seng Lat hte nta masha ni, Jinghku jingyu ni, Sasana Ginwang kata na Jau Ma Tara Hkaw Sara ni, Edin San Luka Chyum Jawng ma ni hte hpung masha ni law law sa du shawng lawm ma ai.

Poi lamang hte maren, dai shani na Missa hkungga hta Brother Paul Zingtung Htoi Naw gaw, Wa Saradaw Francis Daw Tang a lata kaw nna Deacon aya hpe hkam la sai rai nga ai.

Deacon Htoi Naw hku nna shi a hkam sha lam hpe *“Jahpawt kaw na lamu marang n htuk ai ai majaw hpung masha jinghku jingyu ni n sa du lawm lu na hpe grai tsang ai, raitim yawng sa du nna ngwi pyaw awngdang ai hte Deacon aya hpe hkam la lu sai majaw grai kabu ai, grau nna gaw , Ya gaw Jau tai na matu, Jau ni na uhpung uhpawng de shang wa sai re majaw, Karai Kasang a magam bungle hpe san seng san pra ai hte gun hpai na matu ninggam langai re sai ‘* nga nna tsun lai wa ai.

Missa ngut ai hte Wa Saradaw shana ai hta, Deacon Paul Zingtung Htoi Naw a htani htana Jau aya hkam la ai Jau Tai poi hpe dai ning laman, Kachyi htu Jau Ginwang kata kaw nangbat langai lang hku nna galaw na matu Ginwang up Jau hte hpung masha ni tang shawn da ai lam nga ai, dai hte maren, dai ginra de mung masa htuk ai rai jang, galaw byin na re, n dai masing lam byin wa nna htap htuk simsa ai hku galaw lu na matu akyu hpyi garum na matu tsun lai wa sai.

Jau Shatai Poi galaw na hte seng nna mung *“Anhte Kachyi Htu Jau Ginwang hpaw da ai gaw 75 ning Jubili pi galaw la lu sai, raitim dai shara de Jau shatai Poi kalang mung n-galaw ga shi ai, Saradaw mung anhte hpung masha ni hpyi shawn ai hte maren dai shara de galaw na matu myit ai zawn gaw nga ai, dai majaw hpung masha ni hpe ningmu jahpaw mu shangun mayu ai hku nna Kachyi Htu kaw galaw na matu masing nga ai lam, atsawm hkrak gaw n chye shi ai”* nga nna tsun lai wa sai rai nga ai.

Deacon Paul Zingtung Htoi Naw gaw ,Kachyihtu Jau Ginwang, Layen Mare kaw shanu nga ai Slg.Zingtung La Doi hte Jan.Sangan Kaw Tawng yan a Kasha rai nna, Kanau kana ni marai (5) nga ai hta na kaji htum, hpung dim kasha re ai lam, Kaji ten, Kachyi Htu Jau Ginwang, Layen Mare, Shanglawt Asuya Lawu Tsang Jawng hta jawng lung lai wa nna, Tsang (9) hte Tsang (10) lahta tsang hpaji hpe Myitkyina, Aungnan, San Columban Jau Tai Jawng kaji kaw nga let sharin hkaja la sai.Dai hpang,sumtsan Dakkasu Jan Mau (Distance Education) lu ai hpang 22 April 2012 ya shani Brother shanggan la nna Pyin Oo Lwin, Yangon hte Tawng Gyi hkan hpaji sharin la ngut ai hpang ya Deacon aya hpe hkam la ai re lam chye lu ga ai.

**Thomas**